

Buohcci luhtte

Rohkosbottu jođiha báhppa, searvegotti eará bargi dahje searvegotti lahttu.

Minstara sáhhtá heivehallat.

Oljjuin vuoidamii (čuoggis 6) geavahuvvo borramušolju, omd. oliivaolju.

Vilges liinniin gokčojuvvon beavddi ala sáhhtá bidjat Biibbala ja ruossa dahje krusifivssa sihke cahkkehit gintala.

Dalle go buohcci luhtte dollojuvvojit eahkedaččat, geavahuvvo minsttar Rihpat buohcci luhtte.

1. Sálbma

Sáhhtá geavahit ovdamearkka dihte sálmma 200, 204, 205 dahje 422.

2. Álggahus

Álgosivdnideapme

Buressivdnádusa lea vejolaš lohkat dahje lávlut.

B/O Áhči ja + Bártni ja Bassi Vuoiŋŋa nammi.

S Ámen.

B/O Hearrá lehkos dinguin.

S Nu son lehkos maddái du vuoiŋŋain.

Álggahansánit

Álggahansániid lea maddái vejolaš ráhkadit ieš.

B/O Ráhkis ustibat. Jesus lea bohtán juohkit minguin bákčasiiddamet ja givssiideamet. Biibbalis celkojuvvo: ”Son válddii eret min vigiid ja guttii min buozalvasaid”. (Jes 53: 4)

3. Biibbalsálbma

Sáhttá atnit maddái girkojagi čuovvu dahje eará biibbalsálmmaid.

Biibbalsálmma sajis lea vejolaš lávlut sálmma.

Biibbalsálmma sáhttá lohkat dahje lávlut. Biibbalsálbmii laktojuvvo Uhca gudni. Uhca gudni guđđojuvvo eret 5. fástoáiggi sotnabeaivvi rájes.

Herrá lea mu báimman,

ii mus váillo mihkkege.

Ruonas gittiide son livvuda mu,

vuoiŋnadusa čázi lusa son láide mu.

Son áhpásmahttá mu sielu.

Son doalvu mu vanhurskkisvuoda bálgáid mielde namas dihtii.

Vaikko mun vádjolivččen jápminsuoivana leagis,

de in balaše mange bahás.

Dasgo don leat mu mielde.

Du soabbi ja báimmansoabbi jeddejit mu.

Don ráhkadat munnje beavddi

mu vašálaččaid čalmmiid ovddas.

Don vuoiddat mu oaivvi oljjuin,

mu juhkanlihtti golgá badjel.

Aivvefal buorre vuolta ja árbmugas vuolta

doarridit mu buot mu eallinbeivviid,

ja mun beasan ássat Herrá viesus

guhkes áiggiid čada.

Sál 23

DAHJE

Man guhká, Herrá?

Vajáldahtátgo mu?

Man guhká čiegadat ámadajot mus?

Man guhká leat mus morašlaš jurdagat sielustan

ja moraš váimmus geažos beaivvi?

Man guhká mu vašálaš lea vuoitu bealde?

Geahča deike ja vástit munnje,

Herrá Ipmilan.

Čuvge mu čalmmiid,
aman oaddát jápmimii,
amas mu vašálaš dadjat:
”Mun vuiten”,
ja amaset mu vuostálastit illudit go mun suoibbun.

Muhto mun dorvvastan du oskkáldasvuhtii,
mu váibmu illuda du bestojumis.

Mun dáhtun lávlut Herrái,
dasgo son lea dahkan munnje buori.

Sál 13: 2–6

DAHJE

Mun ohcen Herrá
ja son vástidii munnje,
son besttii mu eret buot balus.

Sii geat gehččet su guvlui, báitet ilus,
eaige sin muodut goassege ruvsot heahpanemiin.

Vártnuheapmi čuorvvui, ja Herrá gulai,
son besttii su eret buot átestusain.

Herrá engel várjala ipmilbalolaččaid
ja beastá sin.

Muosáhehket ja oidnet ahte Herrá lea buorre,
ávdugas dat guhte dorvvasta sutnje.

Ballet Herrás, dii, su bassi olbmot,
dasgo sis geat ballet sus, ii váillo mihkkege.

Sál 34: 5–10

DAHJE

Nugo sarvvis goikaluvvá golgi jogaid maŋŋái,
nu goikaluvvá mu siellu du maŋŋái, Ipmilan.

Mu siellu goiká Ipmila maŋŋái,
ealli Ipmila maŋŋái.

Goas beasan loaiddastit su muoduid ovdii?

Manne don muosehuvat, sillon,
manne máraidat mu siste?

Vuordde Ipmila! Dasgo velá oktii mun giittán su,
beastán ja Ipmilan.

Sál 42: 2–3, 6

Uhca gudni

Gudni Áhččái ja Bárdnái
ja Bassi Vuigŋii,
nugo lei álggus, dál lea ja álo
agálašvuodas agálašvuhtii. Ámen.

4. Biibbalohkan

Lohkkojuvvo okta dahje moadde čuovvovaš čálabihtáin.
Sáhtá atnit maid girkojagi čuovvu dahje eará čálabihtáid.
Biibbalohkama maŋŋá sáhtá leat jaskes mediteren.

Job 19: 25

Jes 53: 3–4

Ef 3: 14–21

Mun sodjalahtán čippiidan Áhči ovddas, gii lea sin buohkaid áhčči geat gohčoduvvojit mánnán almmis ja eatnama alde. Vare son geas lea nu cealkemeahttun hearvásvuohta, nannešii din siskkáldas olbmo fámuinis ja Vuoiŋŋainis, vai Kristus ásašii din váimmuin go dii oskubehitet. Ja vare ráhkisvuohta livččii din ruohtas ja vuoddu, vai dii áddegoadášeiddet Kristusa ráhkisvuoda govdodaga ja guhkkodaga, allodaga ja čikŋodaga, ja oahpašeiddet dovdat maddái dan, mii manná buot dieđu badjel, dassáži go oppa Ipmila dievasvuohta deavdá din.

Son guhte duddjo min siste fámuinis, ja sáhtá dahkat valljugasabut go dan maid mii sáhttit rohkadallat ja áddet, sutnje lehkos gudni girkus ja Kristusis Jesusis buot buolvvaid čada álo ja agálašvuhtii! Ámen.

Fil 4: 6–7

Allet ane morraša mastege! Buktet baicca buot dárbbuideattet ovdan Ipmilii rohkadallamiin ja ánodemiin giitevašvuodain! De Ipmila ráfi, mii manná buot jierpmi badjel, várjala din váimmuid ja jurdagiid Kristusis Jesusis.

1 Joh 4: 9–10

Nu lea Ipmila ráhkisvuohta almmustuvvan min gaskii ahte son vuolgahii áidnoriegádan Bártnis máilbmái vai mii ealášeimmet su bokte. Ráhkisvuohta ii leat dat ahte mii leat ráhkistan Ipmila, muhto ahte son lea ráhkistan min ja vuolggahan Bártnis min sudduid soabahussan.

Matt 7: 7–8

Jesus cealká:

”Átnot, de oažžubehtet. Ohcet, de gávdnabehtet. Goalkkuhehket, de didjiide rahppojuvvo uksa. Dasgo juohkehaš guhte átnu, oažžu, ja son guhte ohcá, gávdná, ja guhte goalkkuha, sutnje rahppojuvvo uksa.”

Mark 1: 30–34

Simmona vuoni lei veallámin seanggas heajos buohccin, ja sii muitaledje dan dakkavide Jesusii. Son manai su lusa, dollii su gihtii ja čuoččáldahtii su. Dávda luittii su, ja son bálvališgodii sin.

Go šattai eahket ja beaivváš lei luoitádan, de sii bukte su lusa buot buhcciid ja bosttahuvvon olbmuid, ja oppa gávpot lei čoagganan uvssa ovdii. Son buoridii olusiid geain ledje mánggalágán dávddat, ja ájii olggos mánga bahá vuoijŋa.

5. Vástáduš

Vástádussan sáhtá leat sálbma dahje lávlla. Sáhtá geavahuvvot ovdamearkka dihte sálbma 420, 425 dahje 426.

6. Rohkosoassi

Rohkosoasi sáhtta álggahit rihašemiin.

Buressivdnideapme

MOLSSAEAKTU A

Gieđaidalabidjan

Doaimmaha ollašuhtti bidjá gieđa buohcci oaivvi ala ja cealká:

Don leat bassi gásttas váldojuvvon Ipmila ágálaš árbmolihttui. Beastámet Jesus Kristus lea lohpidan leat duinna juohke beaivve, dál ja eallimat loahpa rádjai. Son cealká: “Ustiban, leage dorvvolaš mielain, du suttut leat dutnje ándagassii addojuvvon.”

Hearrámet Jesusa Kristusa árbmu ja Ipmila ráhkisvuohta ja Bassi Vuoiŋŋa oasálašvuohta lehkos duinna. Ámen.

Buressivdnádusa vuostáiváldi.

Ámen.

MOLSSAEAKTU Á

Oljuin vuoidan

B/O Biibbalis celkojuvvo: ”Juos oktage din gaskkas lea buohcamin, de rávkos lusas searvegotti vuorrasiid, ja sii galget rohkadallat su ovddas ja vuoiddadit su oljuin Hearrá nammii. Dalle oskku rohkos beasta buohcci, ja Hearrá čuoččáldahtta su. Juos son lea suddudan, de sutnje addojuvvo ándagassii.” (Ják 5: 14–15)

Doaimmaha ollašuhtti dahká oljuin buohcci gállui ruossamearka ja cealká:

Dán Biibbala sátnái luohhtimiin mun vuoiddan du, NN (ovdanamat), Áhči ja (+) Bártni ja Bassi Vuoiŋŋa nammii. Báze Ipmila háldui.

Buressivdnádusa vuostáiváldi:

Ámen.

Rohkos

Sáhtta atnit maiddái iešráhkaduvvon rohkosa.

B/O Rohkadallot.

Buotveagalaš Ipmil. Don leat callima gáldu ja veahkehat sin, gudet dorvvastit dutnje. Mii giitit du buressivdnádušastat ja rohkadallat: Oro NN:in, doarjjo ja nanne su. Juos du dáhttu lea, dearvvasmahte su. Atte viisodaga ja návccaid su lagaš olbmuide ja buohkaide, gudet su dikšot. Divtte doaivvu bissut ja guoddit buot bottuin. Dán mii bivdit Bárnát Jesusa Kristusa namas.

S Ámen.

Áhččámet

Hearrá rohkos celkojuvvo ovttá jitnii.

S Áhččámet, don guhte leat almmis.

Basuhuvvos du namma.

Bohtos du riika.

Šaddos du dáhttu,

mo almmis nu maiddái eatnama alde.

Atte midjiide odne min beaivválaš láibbi.

Ja atte midjiide min suttuid ándagassii,

nugo miige ándagassii addit velggolaččaidasamet.

Alege doalvvo min geahččalussii,

muhto beastte min bahás eret.

Dasgo du lea riika ja fápmu ja gudni agálašvuhtii.

Ámen.

7. Buressivdnáduš

B/O Buressivdnidehkos min buotveagalaš ja árbmugas Ipmil,

Áhčči ja (+) Bárdni ja Bassi Vuoigŋa.

S Ámen.

DAHJE

B/O Hearrá buressivdnidivččii din ja várjalivččii din.

Hearrá čuvgešii muođuidis didjiide

ja livččii didjiide árbmugas.

Hearrá jorgalivččii muođuidis din beallái

ja attášii didjiide ráfi.

Áhči ja + Bártni ja Bassi Vuoiŋŋa nammii.

S Ámen.

8. Loahpahanmusihkka

Sáhhtá atnit ovdamearkka dihte sálmma 198, 331 dahje 434. Sálmma sajis sáhhtá leat vuoiŋŋalaš lávlla.